

RNI 68092/83 Regn. No. N.E. 1024

From

Synod Literature & Publication Board

Synod Press Building (Top)

Aizawl – 796 001, Mizoram

Phone : 2324590



E-mail : slpb@rediffmail.co.in

Vol. XXIV No. 326 NEWSLETTER

November, 2010

SYNOD OFFICE BUILDING THAR HAWN A NI TA

*** Lei chhuat zawl aṅanga chhiarin chhawng ruka sak a ni**

*** Office bakah Committee Room tē deuh pahnih leh a lian mi 300 leng vel a awm**

Ni 7.7.2007 zing dar 7:00-ah khatih laia Synod Moderator Rev. Vanlalchhungan a lungphum a phum a. Synod Office building thar, Mission Veng, Aizawl mi chu ni 11.11.2010 chawhnu dar 2:00 khan Synod Moderator ṅang lai, Rev. C. Chawngliana a hawng ta. Hawna inkhawm hi Rev. Vanlalzuata, Sr. Executive Secretary-in a kaihrui a. Rev. Zosangliana Colney, Executive Secretary i/c Property, etc. leh Architect Dr. Lalbiakmawia Ngente ten sak a nih chhoh dan chanchin sawiin Mizoram Synod Choir an zai a; Pathian hnena Office building thar hlan pahin Synod Moderator-in hawna thuchah tawi a sawi a; Synod Secretary, Upa Vanlalhuman lawmthu a sawi hnuin Rev. Lalchama, Synod Moderator lo ni tawhin malsawmnain inkhawm a ṅin. He inkhawmah hian sawm bik mi 1,000 vel an pung khawm a ni.



Rev. Zosangliana Mizoram Presbyterian Kohhran Synod Office lo awm ṅan dan leh sak ṅat a lo nih tawh dan te, Office thar sak a nih theih nan a hlui ṅhiat hnatlangah Bial 32 leh Kohhran mal 129 aṅangin tha 4524 sên a nih thu a report bakah, “He in ropui tak hian Mizoram Presbyterian Kohhran inlungualna leh nghehzia a hmutu apiangte hnenah a lantir ang a, he in aṅang hian Pathian ram zauna leh nghehna tur hna ṅa tinreng thawh a ni ang tih hi ka beisei leh ṅawngṅaina a ni e,” a ti.

Architect Dr. Lalbiakmawia Ngentein a sak dan Technical Report a pek aṅanga a lan danin Synod Office Building ṅhuthmun (ground coverage) hi 4,980 Sq ft a ni a. A inpui zauzawng chu 78’x 60’ a ni a, a pum pui chhuat (total floor area) hi 29,880 Sq ft a ni. A hnuai ber aṅanga a chung inchhun (roof truss) inngahna chu feet 66-a sang a ni. Office

chhungah hian Synod hotute tan bik pindan hran siam a ni a; Synod Officers’ Room leh Committee Room hrang hrang pathum a awm bawk. A dang zawng hi chu open office system-a kalpui a ni.

A hnuai ber (Basement) chu motor hunna te, Drivers’ Room leh thil dah ṅatna te a ni a. A hnuai ber dawttu (ground floor tia sawi)-ah Synod Moderator, Senior Executive Secretary, Office Superintendent, General Administration, Reception Office, Finance Manager, Finance Department, Pension & Provident Fund leh Revival Department an awm.

A chungah Executive Secretary i/c MSSU etc. leh Secretary & Editor, SL&PB room a awm a; chu bakah Synod Literature & Publication Board, MSSU, Music, Property, Kohhran Hmeichhia leh Synod Officers’ Room te a awm leh a.

A chung leha Executive Secretary i/c Mission etc. room leh Secretary, SMB room, Synod Mission Board, Synod Social Front, Kristian ṅhalai Pawl, Education leh Committee Room.

Hemi chungah hian Archives, Synod Information & Publicity, Synfo Studio – I & II leh Committee Room te a awm.

Chhawng linaah chuan feet 78x45-a lian J. M. Lloyd’s Hall te, thil dah ṅatna room te a awm a, chhawng tinah hian inthiarna nuam tawk tak a awm vek a ni.

Pathian hnena hlantu Rev. C. Chawngliana, Synod Moderator chuan, “Pathian leh a Kohhranho tana dik tak leh fel taka rawngbawl hna thawhna hmun pui ni tur te, Pathian ram zauna tur leh Kohhran insawh nghehna atana rawngbawl hmun ni tur te, ringtu nun ze dik tak lantirna hmun leh Kohhranho rorelna hmun ni turin Pathian hnenah ka hlan e,” tiin ribbon chep chatin a hawng zui a ni.

phêk hnihna thlûr hnihnaah zawm a ni



Editorial Staff

Rev. Thangzauva Upa H. Ronghaka
Rev. B. Lalngkhakliana
Upa C.H. Thangkhuma

Nun hlutna leh a awmzia hre chiangtute chuan an nunah Pathian an dah hmasa ber a, a pahnhnaah mi dang, a hnukung berah anmahni. Nun awmzia hre fuh lo chuan hemi letling chiah hian nun an hmang thung. Miten Mother Teresa an ngaihsanna chhan chu mi rethei leh harsate tan a inpek nasat em vang a ni. Isua Krista kan ngaihhlutna chhan pawh mi dangte tana a nun a hlan vang a ni. Hring nun hlutna, dam chhung ni chhiar dan tha ber chu Pathian leh mi dang tana inpek hi a ni.

PRESBYTERIAN BIBLE SCHOOL ADMISSION

Presbyterian Bible School, Mission Vengah C.Th (Certificate in Theology) zir tur lak a ni leh dawn a, zir duhte tan heng hi hriat tur a ni.

Zir hun chhung : January – April, 2011
Dil hun chhung : December 1, 2010 tlai dar 3: 00 thleng
Dil thei chin : Class VII passed, kum 16 chin, Kohran dan chhunga awm
Interview : December 6, 2010 (Mon) zing dar 10:00
Admsn. Form : ` 5/-in office-ah lam tur
Stipend : Zirlai hnenah ` 300/-p.m. pek an ni ang
Class tan hun : January 14, 2011 (Zirtawpni)

Hre chiang duh tan Ph. 0389-2317343/2301602/9436352792-ah zawh fiah theih a ni.

Sd/- Rev. V. Lawmkima
Principal
Presbyterian Bible School

HLA INPHUAH SIAK

Synod Higher Secondary School kum 50-na (Golden Jubilee) lawmna hla inphuahsiakah a duh apiang tan tel theih a ni. Hriat turte: Sapṭawng (English) a ni tur a ni a. Hla thupui atan 'SYNOD HIGHER SECONDARY SCHOOL' tih tur a ni. Eng hun pawha sak theih tur duh a nih avangin, hla thu-ah Jubilee chungchang tarlan loh tur. Hla thlûk siam nghal a ngai lo. A thlûk siam hi intihsiakna hranga la kal tur a ni (A thlûk siam intihsiaknaa mahni hla telh phal lo turte tan he hla inphuahsiaka tel hi a remchang lo vang). Hla seizawngah tlar 20 aia tam lo tur a ni a. A hnuaia address tarlanah hian ni 7.1.2011 (Zirtawpni) ral hma ngeiin computerised/typed copy theh luh tur a ni. Hla phuahu hming, address leh contact telephone number chiang taka tarlan tur. Lawmman Pakhatna- ` 5,000/-; Pahnhna - ` 3,000/-; Pathumna - ` 2,000/-

Principal
Synod Higher Secondary School
Mission Vengthlang, Aizawl

phêk khatnaa mi zawm

Synod Office building thar hi Synod Property Committee ruahmanna hnuaiah Synod Property Working Committee enkawlin, departmental-a sak a ni a. A theih chin chinah in sakna bungrua leh mamawh ngaihtuahin, hnathawktute ruaiin in sak hna hi kalpui a ni. A enkawltu Committee hian uluk takin Office sak chu a vil a; Committee pawh vawi 27 lai an thu khawm hman a ni. Anni bakah hian a hmuna in sak enkawltute chu - Consultants : M/s L.B. Associates; Architect : Dr. Lalbiakmawia Ngente; Structural Engineer : Er. H. Zoramliana; Work Manager : Pu J. Lalhmachhuana; Work Supervisor : Pu R. Lalhmingliana te leh Synod Office lam atangin Pu Thangliankhuma AE leh Pu P.C. Lalrinawma Work Supervisor ten a bul atanga a hawn ni thlenga uapin ngawrh takin an vilpui reng bawk.

Synod Office Building hi a bang pawn lamah Aluminium Composite Panel (ACP-bright silver) hman a ni. Hei hi in sakna hmanraw chhuak thar, nalh leh enkawl awlsam, sik leh saa danglam lo, a khât tâwka sil fai mai tur chi a ni. A chhuatah hian RCC Slab chungah vitrified tiles leh marble phah vek a ni a. Office hnuaiah tui litre 291,185 dawng thei tur tuikhuah siam a ni bawk. Office bungrua pawh a theih chin chinah a thar hman tum a ni a, Office building nen pawh a inhme hle.

Synod Executive Committee leh Synod Property Committee-in Synod Office building sakna senso tura a pawm chu ` 2,46,00,000/- (` 246 lakh) a ni a; hei hi PWD Schedule of Rates 2003 behchhana siam a ni. In sak tan a nih hian PWD Schedule of Rates 2007 a lo chhuak a; chumi mila chhût chuan ` 3,85,40,000/- (` 385.40 lakh) a ni. Hemi bakah hian Committee in a rel angin thil dang eng emaw zat belh chhah leh thlak danglam a awm a, a langsar zual deuh leh a senso tlangpui chu hetiang hi a ni -

- | | | |
|-----------------------------------|---|--------------------------|
| 1. Inchhawng chung ber sak belhna | - | Chêng nuai 31.74 |
| 2. Tuikhuah (Water Reservoir) | - | Chêng nuai 9.20 |
| 3. Pawn lam bang belna (ACP) | - | Chêng nuai 48.27 |
| 4. Structural Glazing | - | Chêng nuai 11.23 |
| 5. Internal partition | - | Chêng nuai 22.46 |
| 6. Office kawt zauhna Lungrem | - | Chêng nuai 16.70 |
| 7. Generator lian leina | - | Chêng nuai 5.70 |
| A vaiin | - | Chêng nuai 145.30 |

Tichuan, a tira ruahmanna bak tihbelhna zawng zawng nen November 2, 2010 thlenga Synod Office Building thar sak nana senso zawng zawng chu ` 5,22,80,518/- a ni. A chungah tarlan hna belhchhahna tel lova senso chu ` 3,77,50,518/- a ni.

Synod Office tharah hian a hnuaia ber atanga a chung sang ber thlenga inkhai chhohna (lift/elevator) pakhat dah a ni a, a hawn niah hian hei hi hman theiha peih hman a ni ta lo va, hman theih a nih hun chuan hetah hian a rualin mi paruk chuan theih tura ngaih a ni. Tuna sên chin bakah hian sên belh ngai a la awm nual dawn a, a luah tak tak chu kum thar 2011 bul lamah a la ni dawn niin thu kan dawng.



Enghelh nei tih hriat fahran thian dun lo kalte chuan Râl Vêngtu hnenah, “Râl Vêngtu, mi thenkhat an thu sawi chauh thutaka ngaituten,” Mihring a piangthar thei lo” an tih hi a dik em?” an ti a. Râl Vêngtu chuan, “Dik teh nang aw! Nikodema anga harsatna nei an lo lang leh ta a nih chu. ‘I piangthar tawh em? tiin zawt che u ila, ‘piangthar tawh e,’ tiin min chhangin ka ring. Kohhranho zingah, ‘piangthar tawh zawng he lamah lokal r’u’ ti ila, an lo kal hum hum mai ang. Chu chuan pianthar theih a nihzia a tifiyah mai alawm. Mahni nihna ngei pawh ni lo anga miin an sawi chuan in awi mai dawn alawm le! Bumin awm suh u,” a ti a.

Anni chuan, “A nih leh, ‘Ring thei kan ni lo,’ tia an sawi hi a dik reng em?” an ti leh a. Râl Vêngtu chuan, “Teuh lo mai. Ring thei lo - bawng leh vawkte chu Kohhranin Camping/Crusade pawh kan neihpui ngai hlei nê. Ring thei lo hnênah Pathian thuin, ‘I rin chuan ..., a ring apiang...,’ a ti lo vang. Pathian kan ring thei lo tih rin theih leh lawi si pawh hi a dik lo hrim hrim alawm. Hetiang thu sawia vâk vâk thinte pawh hian mihringin Pathian kan ring thei lo tih hi pawm tak tak chu ni se an vâk an vâk kher lo vang. Anmahni pawhin an pawm loh thu hril an nih hi,” a ti a. Mite chuan, “Râl Vêngtu, bumna thu belhchian dawl lo hril leh pawmtute tan pawh harh chhuah ngei ngeina tur khawpa thu awmze nei min hrilh hi kan va lawm em! Hriatna tura beng nei zawng zawng chuan hre mawlh rawh se,” an ti a.

RAWNGBAWLNA HNA RUAK

Synod Mission Board chuan kum 2011 chhunga thawk turin Contract Missionary, category hrang hrang (Evangelist, E/T, Staff Nurse, Health Worker, Puanthui zirtirtu) a la thar leh dawn a, dil duhte tana hriat tur hetiang a ni:

1. Dilna chu plain paper-ah ziakin Secretary, Synod Mission Board address-in Nov. 25, 2010 4:00 p.m. thlang theh luh theih a ni.
2. Dilnaah chuan mahni bio-data chiang taka ziak tur a ni; mahni lawina Kohhran lehkhah leh thiamna tilang thei lehkhah thil tel bawk tur a ni. Ni 29.11.2010-ah interview neih tur a ni e.

Sd/- Rev. Lalchhuanmawia
Secretary
Synod Mission Board
Contact no. 0389-2325899

PRESBYTERIAN HOSPITAL, DURTLANG OCTOBER 2010 CHHUNGA THIL DAWNTE

I. Charity Fund

1. S.S. Committee, Kolasib Hmar Veng Bial	∩	2,650
2. Gate Way Enterprise, Bawngkawn	∩	1,000
3. New Serchhip Bial Kohhran Hmeichhia	∩	2,000
4. Hunthar Veng Kohhran, Aizawl	∩	7,000
5. Ramhlun North Bial Kohhran Hmeichhia	∩	5,000
6. Shillong Mizo Kohhran Hmeichhia	∩	3,000
7. Life Drug Centre, Aizawl	∩	20,000
8. Pi Lalsangluaii, Khatla	∩	2,000
9. Hming thup	∩	6,000
10. K.T.P, Chawnpui Bial	∩	5,000
11. Hriat loh	∩	1,000
TOTAL		54,650

II. Thisen pek leh dawn

1. Aizawl City Co-ordination Comt., Catholic Thalai Pawl	52 Units
2. K.T.P, Chaltlang Branch	72 Units
3. K.T.P, East Phaileng Branch	37 Units
4. Women Polytechnic, Durtlang	44 Units
5. K.T.P, Tanhril Bial	46 Units
6. Student Self Support Union	85 Units
7. K.T.P, Thingdawl Bial	45 Units
8. K.T.P, College Veng Branch	37 Units
9. Durtlang Higher Secondary School	61 Units
TOTAL	479 units

III. Thil dang

1. Pu R. Rochhuma, Lunglei Venghlun	Water Filter
2. Mizoram State Library	Lehkhabu 167

Thilpek min petu zawng zawng chungah Pathian hmingin lawmthu kan sawi tak meuh meuh a ni.

Sd/- Rev. C. Lalbiakhluna
Chaplain
Presbyterian Hospital

NCCI GENERAL SECRETARY THAR TUR REV. DR. ROGER GAIKWAD

Aizawl Theological College Principal, Rev. Dr. Roger Gaikwad chu National Council of Churches in India (NCCI) General Secretary tura thlan a ni a, Synod Executive Committee pawhin he rawngbawlinaa a kal hi a phalsak a, kum thar lamah a hna thar hi a zawm dawn niin thu kan dawng. A hmun ruakah ATC Vice Principal-a awm mek Rev. Prof. Vanchhuanawma chu Acting Principal-a awm turin SEC-in a ruat nghal bawk.

India ram Kohhran hrang hrangte leh Regional Council eng emaw zat thawhhona, NCCI Office hotu lu ber, General Secretary-ah hian Mizoram Presbyterian Kohhran Minister, Rev. K. Lungmuana a lo awm tawh a; tunah Rev. Roger-a a awm leh thei tur hi Mizoram Kohhranah miten beiseina sang tak an nei tih tilangtu nia ngaih theih a ni.



Chhungkaw Chanchin

Farkawn Kohhran chuan Aug. 20 – Sept. 12, 2010 chhung khan Pu R. Zaihmingthanga, Gospel Thunder Team Speaker ruaiin Revival Camping chhawng thum an nei a, camper 686 zingah Kohhran pawl dang mi 85 lai an ni. Biak In thleng ngai loten Pathian an fak a, camp chhung hian mi thahnemngaiten sial, vawk leh sum eng emaw zat an thawh khawm a, Kohhranhoten an hlawkpui hle.

Phuaibuang Kohhran chuan Aug. 25 – Sept. 17, 2010 chhung khan Mi Lungngaite Thian Team Speaker Upa Lalchhanhima Hnamte ruaiin Gospel Camping chhawng nga an nei a, Kohhran pawl dang mi eng emaw zat an tel. Hartharna ropui tak a thleng a, Kohhranin an hlawkpui hle.

Mimbung Kohhran chuan C. Lalnunsanga (Joshua Operation Team) ruaiin Aug. 19 – Sept. 27, 2010 chhung khan Camping chhawng nga an buatsaih a. Zu zuar leh zu in eng emaw zat in piantharna an nei a, khawtlang boruak a nuam hle. Zu zuar simte tanpui nan mi thahnemngaiten ` 18000/- zet an thawh khawm. Khawtlang hmel danglam dawrh khawpin harhna a thleng a ni ber mai.

Khuangphah Kohhran chuan Gospel Logos Team Speaker Pu C. Lalchullova ruaiin camping Sept. 4 – Oct. 3 chhung khan Gospel Camping an buatsaih a. Presbyterian bakah IKK, UPC, AG leh Adventist atangtein mi thahnem tak an lut bawk. Biak In thleng ngai lote an inkhawm thin a; Pavalai Pawl tha tak din a ni a. Ganja thahnem tak hal ralin Sapzu um tam tawk tak leih buak a ni bawk. Tlai lam dar 3-ah Biak Inah tawngtaina neih thin a ni ta bawk. Khawtlang boruak a danglam phah hle.

Phulbial Kohhran chuan Sept. 11 – Oct. 2, 2010 chhung khan Krista Kros thlangtu Team Speaker Tv. Lalngaihzuala ruaiin camping chhawng thum an buatsaih a; Kohhran pawl dang atang pawhin eng emaw zat an lut a, Pathian hnathawh ropui tak a lang a, Kohhranho an lawm hle.

Bawktlang Kohhran chuan Sept. 21, 2010 – Oct. 10, 2010 chhung khan Lalpa Koh Chhuah Team Speaker, Upa Zarzoliana ruaiin rawngbawltu leh mipui pual Camp bakah naupang pual lang camp te an buatsaih a. Pianthar harhna leh hnungtawlh tawhte harh thar lehna ropui tak a thleng.

Kawrthah North Kohhran chuan Sept. 14 – Oct. 3, 2010 chhung khan Tv. Lakthanggura Sailo, The Zionist Team Speaker ruaiin Camping chhawng thum an buatsaih a, Campers 233 an lut. Naupang lang Camp an nei bawk. Campers zingah ruihlo zuar leh ruihlo ti thinten nun thar neiin, rinna kawnga hnungtawlhnten Thlarau Thianghlim pawlna thar an chang a, Kohhran boruak a nuam hle.

Chhingchhip Venghlun Kohhran chuan Sept. 6 – 26, 2010 chhung khan Dintharlehna Team Speaker Tv. C. Zairemmawia ruaiin Revival Camping chhawng thum an buatsaih a; Kohhran pawl dang atang pawhi mi 11 lai an lut. Kohhranah harhna ropui tak a thleng.

Champhai Kahrawt Kohhran chuan Kros Sipai Team Speaker R. Lalnunkima ruaiin Sept. 15 – Oct. 7, 2010 chhung khan Camping chhawng nga an buatsaih a, he Camp-ah hian Kohhran pawl hrang hrang atang pawhin mi eng emaw zat an lut a; Kohhranin an hlawkpui hle.

Arunachal leh Assam Mission Field huam chhunga Kohhrante chuan October 15 – 17, 2010 chhung khan Pu Lalthuamkunga leh Pu Lalramzauva Ralte ruaiin Healing Crusade an buatsaih a. Damlo 800 vel lai kal khawmin

heng damlote hi rawngbawltute hian an lo tawngtaisak a, mi tam takin tisa leh thlarau damna an chang.

SAWMNA: Khawlailung Venghlun Kohhran chuan December 17-19, 2010 khian an Kohhran Centenary lawm leh Biak In hawn hun hman an tum a. He hun hmanpui tur hian an Kohhrana lo lawi tawh zawng zawng leh Pastor/Pro. Pastor lo awm tawh zawng zawng an sawm.

SAWMNA: Tlangsam Presbyterian Kohhran chuan December 16-19, 2010 khian an Kohhran Centenary lawmna hun hman an tum a. He hun hmanpui tur hian an Kohhrana lo lawi tawh zawng zawng an sawm.

HRIATTIRNA

Synod Multipurpose Training Centre (SMTC), Mission Vengthlang-ah a hnuiaia Trade tarlanate hian training hawn leh a ni a. A hnuiaia hming ziak hnenah hian Kohhran lehkhah thil telin dilna theh luh theih a ni e.

Tailoring	: (Mipa - 20; Hmeichhia - 40 seats)
Shoe making (Mipa tân)	: 5 seats
Zir hun chhung (Course)	: 17 th Jan. – 15 th Dec. 2011
Dil theih hun chhung	: Ni 14.12.2010 thleng
Interview hun	: Ni 16.12.2010 dâr 10:00 a.m.
Zir tura lakte chu Stipend thla tin`	300/- pek an ni ang.

Sd/- Rev. F. Lalrinnunga
Programme Director
SMTC, Mission Vengthlang, Aizawl

TMEF LEH WESLEYAN METHODIST KOHHRAN INLAICHIN DAN

Mizorma Wesleyan Methodist Kohhran leh The Truth Mission Evangelical Fellowship (TMEF) te hian inzawmna chin thui tak an nei a. TMEF Speaker zingah Wesleyan Methodist Kohhrana mite pawh an awm a; chutih rualin Wesleyan Methodist Kohhran Biak In-ah TMEF member-te chu tlangnêl takin an inkhawm thîn. Tin, Mizoram leh Myanmar-a Wesleyan Methodist Kohhrante khi inzawmin, TMEF Evangelist-ten thu leh member-in an chawm. Engpawh ni se, Wesleyan Methodist Kohhran pahnihte hi ‘Tualto Kohhran’ an nih avangin Mizoram Presbyterian Kohhran nen kan inzawm lo va, rawngbawlnaah pawh kan inruai tawn hek lo. Kan Kohhranin Methodist Kohhran inkungkaihna kan neihpui chu Myanmar rama Myanmar Methodist Kohhran (MMK) khi a ni a (Nupa Chungchang Dan Then II.VII.A(10) phêk 49), Wesleyan Methodist Kohhran nen hriat pawlh tur a ni lo. Hetiang hi thil awm dan a nih avangin, Wesleyan Methodist hming lam ri a, kan Kohhran nen inzawm anga sawi a, Methodist Kohhran din tum an awm chuan chung mite chu engti kawng mahin kan hriatpui lo va, kan pawm thei bawk lo a ni tih Kohhran hovin hriat tur a ni e.

(Hei hi Lily Veng Kohhran Committee-in TMEF leh Wesleyan Methodist Kohhran chungchang sawi fiah tura an ngenna avanga ziak a ni e – **Editor, SL&PB**)